

1 4
1777
21




孫

淵

如

年

譜



門 44
號 1777
卷 21

孫淵如先生年譜卷上

孫	子	孫
普	淵	如
二	如	如

大學圖書館
33.3.31
藏書

孫淵如先生年譜卷上

刊

同里張紹南撰

乾隆十八年癸酉君一歲九月初二日辰時生於常州府城觀子巷今為劉氏宅也生前夕大母許太夫人夢星墮於懷舉以授金夫人比旦生君因以命名及長父書屏先生取郊祀志太一贊德星昭衍及淵曜光明之語名星衍字淵如是年三月君父入都君娘纔四月乾隆十九年甲戌君二歲居常州乾隆二十年乙亥君三歲居常州乾隆二十一年丙子君四歲居常州秋父書屏先生中式順天榜第十三名舉人乾隆二十二年丁丑君五歲居常州始從從叔父晚霞先生受業與從兄履謙同學兄先名玉成以戊戌科成

進士

乾隆二十三年戊寅君六歲居常州讀書家塾每夕君自塾歸大母許太夫人篝燈令誦日所習書母金夫人紡繅在側夜深始就寢君為同舍生戲傷額恐大人憐之師責同舍生乃入門故作失足致傷狀識者知君天性仁恕矣是歲父游天津授經楊氏宅同里乾隆丁巳進士直隸雜澤令王公光變客津門相過從王公故精子平術適見君年命推之以為不凡歸里後遂情戚黨以第四女許字之君年命為癸酉年辛酉月甲寅日戊辰時術者或云坐酉向卯龍虎拱門或云辰酉為龍鳳呈祥皆合格

乾隆二十四年己卯君七歲居常州讀書家塾

乾隆二十五年庚辰君八歲居常州讀書家塾

乾隆二十六年辛巳君九歲居常州讀書家塾君幼多

疾或坐臥室中神遊出舍言所見牆屋外過路人事有微驗許太夫人恐其非壽徵常以為憂是歲出痘花幾危許太夫人金夫人抱持不眠者兩旬始愈其秋父自都歸君始識父焉

乾隆二十七年壬午君十歲居常州就外傳讀書閏五月二十二日仲弟星衡生與父生同日因以同壽為小名

乾隆二十八年癸未君十一歲居常州就外傳讀書

乾隆二十九年甲申君十二歲居常州就外傳讀書

乾隆三十年乙酉君十三歲居常州就外傳讀書時

高宗純皇帝御蹕南巡同舍生有引君出東門觀行幄者其日人多擁擠或閉城門致出入者愈積壓踐蹋至死者甚多君年幼在眾人中悶絕鼻衄不止倚人門門倒殞地自以必死忽有翼之起者乃得生送君東

門外小菴中君問此人姓名卒不告至今不知何人也
乾隆三十一年丙戌君十四歲居常州父在都挑選二
等以教職用回籍候選家居課子授以昭明文選君能
背誦全部無誤

乾隆三十二年丁亥君十五歲居常州父署丹陽縣教
諭

乾隆三十三年戊子君十六歲居常州侍父讀書冬父
選授句容縣教諭

乾隆三十四年己丑君十七歲二月父奉許太夫人挈
眷之句容教諭任君隨侍學舍讀書是年九月初三日
季弟星衢生

乾隆三十五年庚寅君十八歲居句容學舍讀書

乾隆三十六年辛卯君十九歲居句容學舍讀書夏歸
常州應院試未獲雋即返句容十二月就婚王氏宅

篆書七月次女生是年洪君應林大令光照授經之聘
於時訓導全椒朱沛少府錢塘汪蒼霖林公子嗣基皆
能詩常相酬唱句容士夫王司馬周南斗南吉士兄弟
駱秀才存友朱秀才鏞沈上舍紹祖同爲勝遊雅集冬
偕林公子洪稚存遊茅山入華陽洞燃燭行數里乃返
作五言古詩四首紀之

乾隆四十一年丙申君二十四歲居句容學舍春外舅
王公至句容邀往和州校試卷逾月乃返時王夫人得
嗽疾七月歸甯君偕回常州訪醫診治病日劇十月二
十三日王夫人卒於母氏所君哭之慟以爲佳偶難得
誓不再娶錄其遺詩十一月權葬於常州東郊之橫塘
鄉歲暮始返句容其後孔太史廣森爲王夫人作駢體
詩序

乾隆四十二年丁酉君二十五歲正月歸常州訪楊君

倫趙君懷玉呂君星垣於澄江君以悼亡未久不與科考而返至句容學舍七月至金陵以王夫人行狀並遺詩乞袁簡齋太史作墓誌太史隨園詩話述其事是科試不第至泰州謁林刺史光照歸途留滯維揚與汪明經中及汪孝廉端光汪上舍文錦方秀才本及其從子又輝萬秀才應馨余秀才鵬年金秀才蘭諸名士為詩會揚州傳誦君詩句寓居文選樓至今以為嘉話十二月返句容

乾隆四十三年戊戌君二十六歲居句容學舍二月二女皆以痘殤三月謁安徽劉學使權之與洪君亮吉校文幕中登白紵山采石磯太白樓泛舟過天門山遊黃山白嶽登天都峯窮極其勝十二月返句容
乾隆四十四年己亥君二十七歲居句容學舍時汪君中客江甯章太守攀桂延君入幕秋

恩科鄉試為劉相國墉錄科見遺君灑然竟歸吟嘯自若

乾隆四十五年庚子君二十八歲二月

高宗純皇帝御蹕南巡君至金陵與召試報罷與方君正澍顧君敏恆儲君潤書讀書金陵城西古瓦官寺君翻閱釋藏全部得一切經音義華嚴經音義多引倉頡三倉因輯而刊行始傳於世後至西安屬莊大令所刊一切經音義夏返句容十月歸常州遊吳門以王光祿鳴盛江布衣聲撰注尚書造門訪謁與談鄭學陝西撫部畢公沅時以母憂家居聞君名延之里第與錢明經坵同修關中勝蹟圖志時蔣侍御和甯錢少詹大昕趙觀察翼來吳門畢公邀遊靈巖山館君與錢君皆在坐其冬畢公奉命復撫陝欲邀偕往君以遠遊必告乃返句容至歲除

行抵西安節署

乾隆四十六年辛丑君二十九歲在西安節署與嚴侍
讀長明錢明經帖校訂古書始為山海經注時吳舍人
泰來莊大令所皆在節署洪君亮吉亦自都入關朱學
士筠素知君名撰句云小學劉臻吾輩定麗詞庾信早
年成書楹帖寄贈

乾隆四十七年壬寅君三十歲客西安節署纂修邠州
醴泉等方志是時節署多詩人約分題賦詩各體擬古
共數十首同人詩成君未就與同人賭以半夕成之但
給抄胥一人約演劇為潤筆既而閉戶有頃鈔胥手不
給寫至三更出詩數十首有東坡生日詩在內即文不
屬稿之作也中丞歎為逸才亟為演劇

乾隆四十八年癸卯君三十一歲在西安節署時姚觀
察頤督糧陝西招君及幕中諸君劉中書召揚蔣孝廉

知讓燕集論文為畢撫部校刊宋敏求長安志及刊山
海經竣事以貲為貢生入都應京兆試乃自蒲州至運
城謁沈觀察業富觀鹽池仲弟星衡亦自句容應科舉
至京八月試罷乃挈仲弟西行陟井陘至晉省迂道河
津觀龍門渡河之韓城訪傅大令之郃陽觀曹全碑入

關

乾隆四十九年甲辰君三十二歲客西安節署時王少
寇昶為臬使幕中多才俊纂金石萃編因留下榻旬日
乾隆五十年乙巳君三十三歲二月自關中至句容省
視大母二親三月上巳偕朱秀才鏞遊西郊得吳葛府
君碑及梁天監井闌文為前金石家所未見四月至大
梁節署

乾隆五十一年丙午君三十四歲客大梁節署二月由
偃師之洛陽觀伊闕至西安客咸甯莊大令所署纂修

長安咸甯縣志四月仍返大梁捐納布政經歷職銜七月返句容就本省鄉試是科主試為朱文正公珪四書首題過位一節君二場經文引經博瞻三場對策通古學朱公搜落卷得之曰此必汪中作也朱公先在都與彭公元瑞約吾此行至江南必得汪孫二人故以君文為汪作遂中式第八十七名舉人朱文正嘗謂君時藝雖不佳吾閱之字裏行閒皆通人氣息也是年汪不就試公曰吾無遺珠也時副主試為江西戴編修心亨今大學士衢亨之兄同榜中式者如阮撫部元汪閣學廷珍張編修惠言後皆以經術受知餘亦多通人俊士海內以江南丙午科為名榜九月至金壇謁房師胡大令志熊因訪季子廟於九里鎮手拓十字碑以歸十一月至大梁

乾隆五十二年丁未君三十五歲正月客大梁節署二

月偕洪稚存唐柘田仁埴入都會試主試為王文端公杰副主試為瑞閣學保姜少寇屢中式二十三名進士對策進

呈

御覽四月

殿試讀卷官為阿文成公桂嵇文恭公璜彭文勤公元瑞紀文達公昀諸人公擬以君卷入十本進

呈或指卷中用貳臣傳一語以為非宜紀公曰此卷博核不入十本吾當引故事單奏彭公曰果爾吾欲聯銜阿公取視之曰此卷吾亦賞之為置第二進

呈

上已改第一閱卷中誤書耕九餘三為耕三餘九仍以

一甲二名

賜進士及第授翰林院編修

上稱今科鼎甲得讀書人寓居青廠今為武陽會館六月父以舉班截取知縣奉大母許太夫人母金夫人自句容歸常州父入都赴選

乾隆五十三年戊申君三十六歲移居琉璃廠官翰林院編修充三通館校理君在庶常館試詩賦援筆立就阿文成公桂王文端公杰皆賞異之每課必拔以冠同館四月仲弟星衡自常州至都六月父選山西河曲縣知縣八月之官仲弟星衡隨侍

乾隆五十四年己酉君三十七歲居琉璃廠官翰林院編修校刊晏子春秋君以父官河曲邊陲山路崎嶇不能迎養二月遣使迎大母許太夫人母金夫人於常州四月散館君試厲志賦用史記鮑叔如畏和相國坤不識疑為別字問之紀文達公昫紀不言乃置君賦二等引

見奉

旨以部員用故事一甲進士改部或奏請留館時和相國知君名欲君屈節一見君卒不往曰吾甯得

上所改官不受要人留館之惠也遂就部郎又編修改官可得員外前此吳文煥有成案或謂君一見和相即得之君曰主事終擢員外何汲汲求人為自是編修改主事遂為成例後有董編修教增亦如君改補五月大母許太夫人母金夫人暨兩弟眷屬至京邸季弟星衢往河曲侍父九月題補刑部直隸司主事君與同年馬君履泰同改部主事缺出散館名次馬在前阿文成公以君榜名在馬前欲先補君君與馬互相讓適又有缺乃同日補官部中同官兩賢之阿文成公嘗重君不入和門每擢官必曰此和相不能致之人也

乾隆五十五年庚戌君三十八歲居琉璃廠官刑部直

隸司主事總辦秋審五月

御賜摺扇荷包君所居埽室焚香為諸名士燕集之所
畢督部入

覲招名公卿雅集於此阮公元時以孝廉館內城與君
尤密又有同志魏君成憲方君體伊君秉綬楊君夢符
王侍御念孫徐民部大榕張太史問陶諸君相過從海
內能文講學之士皆樂登君之堂高麗使臣朴齊家入
都由書肆見君所校古書介所知投刺訪謁君以唐刻
石經持贈因為君書問字堂三字並賦詩以謝是年八
月恭遇

高宗純皇帝八旬萬壽以六品得與
賜宴

覃恩晉贈大父奉直大夫刑部直隸司主事
晉封大母太宜人父以現任例不受

封母宜人

乾隆五十六年辛亥君三十九歲居琉璃廠官刑部直
隸司主事總辦秋審五月題升刑部江蘇司員外郎以
避本省調辦直隸司事君在部寬仁務求平法雖枷杖
輕刑未肯加重平反核讞全活甚多甲有竊主財逾貫
詣其友乙匿其數以告分金而逸事發乙得知情藏匿
罪人減等罪應流君以為律稱知情則坐乙不知滿貫
也應以所知數坐減問徒上之司寇詰以乙所言無質
證如獲甲言實告以逾貫奈何君言此名例所謂通計
前罪以充後數也乙卒得從流減徒君又言律文稱囚
者在繫之名稱罪人者犯事在官之名今或未到官名
之罪人或藏匿罪人問擬縱囚非正名之義大司寇胡
莊敏公季堂常躋其言每疑難獄輒令君依古義平議
行十八司存以為規格湖廣有子護嫁母傷人至死獄

孫作請第一
敕下法司議或以嫁母期服減於母則護嫁母不得與
母同科胡大司寇屬君議君以古者父在為母亦期屈
於所尊嫁母服期因宗子主祭非謂情當殺也引宋王
博文請封嫁母又為行服謂子無絕母禮又引唐八座
議宋史凡父卒母嫁有心喪三年之制子無絕道故也
護嫁母出母俱當與母同議減鬪殺罪大寇是之甲有
馳車犯乙死者已當過失殺罪甲恐以無故馳驟車馬
獲重譴介所知以兼金求免君曰吾不受暮夜金君罪
止過失殺無為人所誑也甲慙謝去有孝子為父報仇
殺縣役坐死其父姊控部弟實為縣役逼斃請檢尸傷
當道某屬託君君曰吾豈能枉法殺孝子哉其他持正
類此
乾隆五十七年壬子君四十歲居琉璃廠官刑部直隸
司員外郎總辦秋審三月扈

蹕西巡過大茂山出龍泉關上長城嶺入晉境至五臺
君父以河曲令治道臺懷因省謁焉時大雪如掌山巖
紅桃徧放歸屬羅處士聘為五臺省謁圖四月回京君
自王夫人亡後十七年不娶大母以君四十無嗣冬命
置側室潘氏

乾隆五十八年癸丑君四十一歲居琉璃廠官刑部直
隸司員外郎總辦秋審春扈

蹕巡幸天津大風阻

御舟

上改乘肩輿至

行宮宿君約同僚步行卅里馳赴

行在

上察各部之無曠班者予錫賚

特賜緞匹是冬移居孫公園宅故多變怪扃戶數年無

孫在請卷一
人敢居者君與主人約減租改宅君以天罡塞鬼戶時
杜寅方後宅遂安甯有枯松復生同人繪圖爲詩紀其
事八月父署大同府渾源州事十一月署沁州直隸州
事至明年夏回任
乾隆五十九年甲寅君四十二歲居孫公園官刑部直
隸司員外郎四月恭預摺扇荷包之
賜五月題升廣東司郎中皆在總辦秋審處退食之暇
補集鄭馬注古文尙書撰問字堂文集冬京察相國阿
文成公大司寇胡莊敏公保薦一等
乾隆六十年乙卯君四十三歲居孫公園官刑部廣東
司郎中總辦秋審春引
見記名以道府用閏二月燕同館吳君錫麒張君問陶
及王孝廉芑孫諸人於櫻桃傳舍各爲詩見王君淵雅
堂集中五月奉

旨簡放山東兗沂曹濟兼管黃河兵備道先十日墜車
折足醫者言百日可愈七月至熱河奉

旨不必請

訓卽行赴任八月奉大母許太夫人母金夫人暨兩弟
眷屬由水程往山東至德州足始能行先至歷下時巡
撫玉德公爲比部舉主甚喜君至學使阮公元先有詩
寄君去萬朵荷花五名士一時齊望使君來馬君履泰
主講灤源書院武進士億桂進士馥及諸名士之在阮
幕者常相燕集於大明湖阮公刊石紀之九月至兗州
道任十一月父河曲公引疾去官仲弟星衡自山右隨
侍至兗州官舍奉檄簿錄伍督部拉納貲財至兗州一
帶截留箱笈數十金玉幣帛累數萬金君一夕簿記報
大府不任吏役抵冒撫部甚稱之君與伍舊識有詩云
昔年曾此遊金谷今日深愁過盜泉十月至歷下奉檄

往泰安費縣交界斷爭煤窯獄道中奉河督檄署運河
道回兗州仍至濟甯勘工曹南與豫鄰豫撫景公安以
匿名書一案連繫數百人入
告君馳往與開歸馬觀察慧裕會鞠方冬囚荷琅璫鐵
鎖衣不蔽體君曰籍其家無證驗是誣也宜盡釋之會
部使者東來供億繁費簪一乘輿夫每日索費三百緡
大吏憂之君曰案早結則省費吾試任其事自夕達旦
親定爰書釋數十人推被誣者生平嫌怨得匿名書者
伏罪結案部使者如君案牘報
聞三日出境去後星使管民部世銘作詩寄君有得情
成讞勞詒我之句注云時鞠匿名飛書案爰書悉本初
贖魚臺有控官案奉檄往鞠平之其後令以君母壽饋
多金會君公出弟星衢卻之君曰吾弟知我濟甯州有
僕傷主陰致死者君鞠其僕得拒姦踢傷狀斷以名分

已絕如平人誤傷活其僕

嘉慶元年丙辰君四十四歲官充沂曹濟道恭逢

今上登極

覃恩

晉贈大父中憲大夫充沂曹濟兵備道

晉封大母恭人

封父中憲大夫充沂曹濟兵備道

晉封母恭人正月奉檄至曹南

諭祭劉督部峩禮畢同黃司馬易游嘉祥紫雲山觀武
梁祠畫象歸為吳孝廉蕭與族妹成婚於署齋族妹貧
隨叔父流轉入都幾為王府筵室君以為不可留育之
如親妹以吳才士許嫁馬至是合卷有南樓卻扇圖各
為詩吳後入翰林洊擢學士朱文正公常以為嘉話三
月赴曹單防汛兗州城西有泗流通濟水名府河又名

魯王運糧河日久淤墊夏秋有水時又以橋梁低壓不便運載君議濬河築埝高其橋梁則充濟通運便民府城市集不至寥落李河督奉翰以爲然君請捐廉舉事後以去任無成其事者君以濟陰湯陵書傳所傳卽在曹南其山西滎河湯陵雖列祀典實宋已來傳譌之迹因徧考諸書據漢崔駰魏皇覽晉伏滔皆云湯陵在濟陰之說移咨晉藩謝方伯啟昆並考滎河之陵出後魏小說家言張恩破陵得銘附會殷湯未爲典要急宜釐正申上大府後君再官東省曹縣孫令立方卒爲修整湯陵廟屋撥地畝奉香火立碑紀事宛州城外有古墓明人題爲柳下惠墓君考柳墓在泰安有元時展氏先塋碑乃題柳下季壠立石識之四月回宛采集括地志刊刻成書五月湖北教匪擾及河南郡縣曹豫接壤一河之隔君奉檄赴曹南駐兵戒嚴康廉使基田奉

命兼治河七月曹南水漫灘潰決單汎君偕康廉使築隄搶禦時新料未刈舊料運載不濟急君鳩工集夫五日夜從上游築隄遏禦大溜中斷河歸中泓不致橫決河帥未爲列上其事君亦恥以此見功云爲詩有黃金與土眞同價滄海爲田止片時又有比戶視民仍按堵看山容我又支頤之句其後十餘年康公過君楊村舟次猶云吾治河數十年未見已決口能卽時堵閉者惟曹南之役吾與君成之省
國家數百萬帑金也時撫部玉德公調任浙江
上以山東新任臬使張長庚在軍營不能來東
命新撫伊江阿會同舊撫舉道員中能勝臬事者以聞
兩撫以君名入奏奉
旨署臬事七月到省八月命兩弟眷屬隨侍大母二親
至濟南臬署君下車日以整肅吏治爲已任親定爰書

不延幕友矜慎庶獄多所平反甲與乙有姻共飲乙醉
墜火炕吐燒酒引火燄灼爛至死甲醉臥不知鞠獄者
坐甲以奪壺斟酒有爭鬪形擬鬪殺罪君曰甲主乙賓
奪乙壺勸之飲名奪實讓也改甲坐過失殺出其罪有
婦因姦謀命獄其婦某家妾夫遠出主母惡之會僕婦
死誣以謀毒問官又實以姦夫言婦淫主婦令僕婦守
之惡而行毒已具獄君鞠婦以某日歸甯僕婦後二日
以子殤與夫爭忿自盡出冤婦於獄囚有其毆人至死
過堂呼冤者自言本緯夫見所過有眾其毆人勸止之
不從而去越數月邑令始拘訊之酷刑誣服下手毆人
君詰以眾中有相識者否答以有舅氏某為縣役在旁
知狀密拘縣役詰之乃因姦殺人縣令回護聽其屬甥
認罪始以鬪殺傷輕緩其死上司駁詰改擬傷重入實
囚知死乃不承君告縣官乃以失察處分枉人命吾為

子救正陰禍也有稱錘傷人者擬戍君言例有沿江濱
海執持兇器稱錘傷人擬遣之條是兇器稱錘非尋常
稱錘也且平人不得謂之匪徒按律減其罪有索負不
償者褫其衣負債人因病猝死科以屏去人服食至死
成獄君檢其時三月杪不得以寒至死改議威逼條生
罪有詬詈婦女致死獄君以事在一月前不得謂之忿
激鞠得婦自與夫毆詈自經狀出生罪凡權臬七越月
平法數十百條活死罪誣服者十餘獄亦不以之罪縣
官云縣官實不盡明刑律皆幕僚誤之也先是臬司問
囚謂之過堂有呼冤者令首府縣加考掠以伏罪故無
平反獄君親問囚自為爰書由是因得盡其詞而承審
官始不能屬託以成冤獄山左風氣為之一變君敦勸
古學嘗以策題試十府士以觀風尚識拔高才生士林
向慕時舉孝廉方正采訪務得實行之士舉文登畢秀

才以田濟甯王秀才宗敬等皆知名士舉中丁卯科舉
人王亦發科引
見記名以知縣用是冬行計典君與康方伯務察廉吏
舉列薦章以杜奔競如蘭山縣崔應辰招遠縣李如珩
後皆以清名受
知膺不次之擢崔官至濟東道李官濟甯直隸州十二
月移咨康方伯請開濟上牛頭河濟水故瀆經荷澤鉅
野鄆城嘉祥濟甯魚臺之境又名安興墓河又名小黃
河合古灘水及澹臺苜宿諸河入舊運河前撫部明興
奏濬未及深通年久又加淤墊一遇雨潦沛充一帶水
無宣洩淹及田禾君請濬深各河故道水潦既有所歸
匯入微山湖又資濟運之用居民之佔種河道者皆非
之久之不能行其後十二年河帥撫部等卒以初議入
告開牛頭河沛上水潦得以宣洩保護民田甚多君發

端也

孫淵如先生年譜卷上

孫淵如先生年譜卷下

同里張紹南撰

嘉慶二年丁巳君四十五歲權臬事正月人日為君大
 母許太夫人九十壽稱觴柏府大吏僚屬登堂拜祝各
 屬有以金幣為壽者奉大母命悉卻之荆撫部道乾時
 為登萊青道嘗稱君為真清吏生平所未見也濰縣有
 武弁犯法挾厚力求脫令不可干因賄通和門致書關
 說君訪捕鞫之械和門來者於衢得書者大驚沮亟掣
 君出省回任防汛奏言知府護理道任呼應不靈
 上以河隄任重即著君回究沂曹濟道任出省時各屬
 感君廉正卻陋規相率斂費贈君君不納道過泰安大
 雪盈尺君去年禱雪泰山至是如有神應為詩云半壓
 紅塵半遮樹卻嫌絮白太分明黃司馬易寫為圖吳祭

酒錫麒有詩五月赴工防汛秋江南豐工及東省曹工同時漫溢君以無工處所得疏防咎加之嚴議當罷任上以兼管官特予留任君外補時有勸加級以防降調者君曰食祿有方吾終安命至是留任道員嚴議無特旨予留者蓋異數云曹工分治引河三道君與濟東道署登萊道各治二十里君所治中段廣深中程君察弊嚴又不煩擾禁焚索工竣視上下段省費每里數萬兩廿里引河共省三十餘萬兩官民比他處得蘇息是冬臘盡駐工次未歸凡堵築決口須合龍後開放引河則水疾下而無停淤時隄未塞而大吏欲放引河君具牘力止之不聽既放水河盡填淤於是又設法抽溝而曹工遂不能堵合矣

嘉慶三年戊午君四十六歲正月駐曹工築隄二月大府奏稱君熟習刑名操守廉潔辦理地方事務均屬裕

如惟河務非其所長因以河工同知署理請以君留補地方道奉

旨允准始君以知刑名署臬司又以防河回任卒又撤河道任留補地方中朝疑之謂是代任者覬覦其缺於是奏駁署任同知不得越次游擢奉

旨如議先是河工分賠之員或得羨餘謂之扣費君不取悉以給引河工費仍取領結存庫而其時曹工尙未堵合河帥撫部亟奏合龍換君任尋又奏稱合而復開則分賠兩次壩工銀九萬兩半屬後任其後司事者并以歸君君亦任之曰吾無寸椽尺土然旣兼河務不能不爲人受過也三月自工次回署納側室晁氏旋奉檄至曹州府權試事人士悅服逾月試畢回究撰岱南閣文稿與畢君以田校刊孫子十家注周易集解周易口訣義夏小正元和郡縣志君考伏羲陵當在魚臺今所

列祀典陳州之陵實非古迹親至鳧山訪得宋元碑碣以伏羲陵果在是呈請大府奏更祀典未見施行五月因旱禱雨君爲文遣弁馬雲從往鳧山請水至之日充東甘霖大沛馬弁後數年治河落水死有旨贈卹塑像曹工張桓侯廟馬故爲君前騶導從者時開例承辦運河工程君弟星衡捐縣丞弟星衢捐布經投效河工君所屬有請代君出貲者固卻之後弟星衢分發北河五月二十二日爲君父七十壽辰舉觴稱慶時母金夫人已得腹脹疾君雖候補卒不至省惟日侍母疾閱醫書憂惶無措親禱尼山不效六月二十七日金夫人卒於兗州官舍君素食苦次杖而後起以古人速葬禮急欲奉柩南歸九月君乃奉大母許太夫人及父自兗登舟兗郡感君德政送喪者互數十里啟行之日惟載萬卷書笈士民咸歎其清節是時黃水泛溢河

湖無際舟過滕縣微山湖大風頓作舟幾覆舟人請換舟以渡君守柩不動風少息柩舟得泊而前舟沈沒溼書畫甚多其後君整理弄藏祠屋曰吾書歷劫或可久也十月抵京口先是君秉父命爲從祖前明功臣忠愍公諱興祖建祠金陵因忠愍故明時肖象雞籠山功臣廟今廢爲曹王彬廟是以立祠安神乃奉大母許太夫人僑居金陵祠屋及許太夫人謁祠象乃驚曰吾歸孫氏聞上世有祖象遺存表工家數年表工疾甚夢古衣冠者告之云吾子孫有爲鼎甲者當送我歸享香火醒檢故篋得象送孫氏述其事不知何世祖殆卽公象也君扶櫬歸常州寄寓天甯寺中十一月葬金夫人於郡城西郊夾港口之祖塋竝遷前母管氏夫人同穴乃歸金陵守制

嘉慶四年己未君四十七歲居金陵祠屋其屋故有古

松五株名爲五松園君加修葺疊石爲假山畜兩白鶴
植四時卉木爲大母遊娛之所作五松居士傳後又添
建西樓及壁立亭乞梁侍講同書書額二月歸常州省
墓遂至浙中晤謝方伯啟昆秦觀察瀛夏釐正神農本
草經三卷付孫方伯公子馮翼刊之秋君丁未同年張
鞠園祥雲出守廬州約君至署與荆撫部道乾晤於廬
州公廨十月歸常州省墓遂至吳門訪吳縣唐令仲冕
鎮洋田令鈞邀君至其署田故涉甯校官爲君舉薦者
十二月返金陵

嘉慶五年庚申君四十八歲居金陵祠屋二月歸常州
省墓時曾運使燠署鹽政聘延君主講安定書院君同
年阮公元撫浙招君佐理幕務至浙並延主紹興鼓山
書院渡江至紹興遂游會稽觀禹廟旁窆石識爲孫皓
刻石又遊吼山歸浙省時撫部又設話經精舍於西湖

之濱招致督學時所拔知名士於其中與君及王少寇
昶迭爲主講命題課業問以經史疑義旁及小學天部
地理算法詞章各聽搜討書傳條對以觀其識湖干建
伏鄭祠堂君親書聯額又起第一樓多邀高才生燕集
秦少寇瀛時官臬使嘗約吳祭酒錫麒及浙中諸名士
爲詩會諸生執經問字者盈門未及十年而話經精舍
士登巍科入館閣及撰述成一家言者不可勝數其後
撫部屬君爲題名記八月返金陵省親屬長興邢大令
澍刻寰宇訪碑錄秦淮分支入城合青溪西流注江城
中河道日久淤墊西有石閘遏水亦廢不修經冬水涸
君以寓公創議濬河設閘呈請當道籌貲辦理卒得施
行後二年康方伯基田至親爲督濬至今秦淮冬夏不
竭居民得過載之便嘗經臺城故址得古磚有錢文爲
大泉五百四字考爲吳後苑城磚九月除母喪歸常州

省墓至吳門主吳縣唐令仲冕署十一月諸名士餞別於虎邱一榭園坐中蔣丈業晉段君玉裁鈕君樹玉袁君廷禱黃孝廉丕烈顧君純顧君廣圻何君元錫李君銳瞿君中溶夏君文燾陶君梁沈君培徐明經頴唐公子鑑李君福戴生延祜各自題名於冊吳君履寫山塘話別圖後十餘年顧君純及徐陶唐三子俱入翰林沈亦舉於鄉君與吳學士蓮次唐大令贈別詩題冊時吳郡任太守許以一榭園為孫子祠後卒成之君方領咨赴補蘇撫岳起已給君咨文經胥以君有賄項未繳索費多金不予稟請扣留君撫部為所惑君曰吾故不欲出仕乃擲還其檄十一月返金陵仲弟星衡以縣丞赴部掣籤分發河南省候補

嘉慶六年辛酉君四十九歲二月仍至杭州四月旋里掃墓過吳門吳縣唐明府以晦日邀段君玉裁萬君承紀及諸名士餞君於石湖看競渡萬君為圖紀事五月返金陵君以金陵六朝所都近代郡志為戚光率意更改名迹無據因求景定建康志適江南制府署中有康熙間

敕賜宋刻本費相國漚總制兩江因以書付君釀費仿刻之費相國嘉君之志分俸錢以襄其事為作重刻景定建康志序十二月奉檄追繳賠項經督撫查明本籍竝無家產現在寄居金陵祠屋無力完繳請俟補官日完交咨部君以大母時年九十有三道府無親老告近例恐簡放遠省不能迎養有不欲出山之意以是遲留不赴補

嘉慶七年壬戌君五十歲居金陵祠屋三月歸常州省墓訪友吳門四月返金陵刊近作為五松園文稿七月

廬州張太守祥雲延君纂修郡志時設局延修志者十
餘人閱兩年眾議紛雜迄無成例君到出所錄古書廬
州故迹示之竝招書院生童十餘人錄史傳人物及地
方事迹乞鈔胥十餘人手定條例隨纂隨書閱月書成
左大令輔爲君舊交時宰合肥服君才敏其後爲壽序
以寄君九月今修撰及門洪君瑩自維揚來金陵以珍
裘爲君壽君卻其儀屬刻元和姓纂十月至揚州寓會
運使燠署齋與署太守張古愚敦仁影刊宋本爾雅圖
十一月返金陵

嘉慶八年癸亥君五十一歲居金陵祠屋君家居數年
藉脩脯以供菽水或有持兼金乞君志墓及爲壽序者
故不至貧乏至是因賠項追呼君父欲君赴補時費制
軍署蘇撫亦促君起官寄與咨文四月返金陵五月挈
季弟星衢北上道由東省撫部鐵公保素重君清名邀

至省城作晤君單騎往見時同幕友錢大令湘爲首縣
所舉孫大令良炳官滋陽君恐東省舊僚有饋贖之事
先札以告以舟車之費竝無缺乏有投贈卻之六月抵
京七月引

見吏部奏請仍發山東以道員用卽奉

俞旨請

訓後乞修墓假回籍季弟以布經籤掣直隸省河工候
補其月出都乘舟南下舟中校荀悅漢紀九月抵金陵
十月歸常州省墓遂至吳門其月返金陵擬以春融奉
大母及父治裝赴東會山東撫部以水患河工振務需
員經理謂君才識練達辦事廉正馳札常州守催君上
道君因東上十二月抵濟南度歲明年正月撫部卽檄
前往究沂曹濟一帶補振災民多加撫卹究沂魏觀察
成憲贈君詩張太史問陶寫爲圖

嘉慶九年甲子君五十二歲正月察振濟南鐵撫部奏署登萊青道事二月奉

旨補授山東督糧道回至平原道中接印赴任越三月督運北行四月歸至德州山東糧道歲例支養廉四千兩君以前任充沂道時分賠曹工帑項申請撫部奏以應得養廉全數扣繳奉

旨賞給一半以為督運之費內有扣三成公費寶銀一千四百兩五月至省聞大母及父已抵濟上迎謁於舟次乃從陸路先之安德道署七月奉檄至省充鄉闈提調官與鐵撫部及周大令雋唱和七律詩九月回署是月季弟星衢自保定乞省親假來途遇於衛河舟次是月至省隨同

欽使鞫獄歸十月至東昌濟甯催漕十一月回德

嘉慶十年乙丑君五十三歲官山東督糧道正月人日

為君大母壽辰時年九十有八歲宮保鐵撫部以許太夫人節行素著年近百齡欲奏請

褒錫君請俟滿百乃上

聞撫部猶偕河帥督學率藩臬道府等撰壽文作屏幃遣使致安德為許太夫人稱祝弟星衢卸署洛陽典史任來德二月督運北上四月回署得北魏高貞墓碑於衛河第三屯昇致德州學宮是年奉

命運采買漕糧二十餘萬內有商捐大米變壞君與撫部暨策方伯丹籌議津貼不敷乃申請并省幫弁丁伍比較豫省節約浮費無算官丁不致賠累五月大母許太夫人痰飲疾作君隨父侍湯藥夜不安寢六月許太夫人疾甚乃馳書季弟星衢乞假來侍病是月十九日許太夫人卒於安德官舍君哀慟過禮請乞假三月委知州代行公事大吏慰喻君然猶不肯視事乞朱文正

公姚太史鼎洪太史稚存作志墓之文阮中丞屬君作其封君墓志亦爲君作大父母合葬墓表八月命仲弟隨父奉大母許太夫人柩登舟歸里合葬於夾港口大父贈公之塋時君適有至充濟催漕之役親送大母柩之臺莊九月返至濟甯隨同

欽使鹽政額勒布勒事沛上十一月回德州

嘉慶十一年丙寅君五十四歲官山東督糧道請開恩縣四女寺支河東省衛河自豫省合清濁漳入境經臨清聞口夏秋水漲高於閘內汶河卽須閉閘謂之閘口糧艘阻滯德州哨馬營及恩縣四女寺舊有兩支河合流入老黃河卽鉤盤鬲津故道經樂陵及直隸吳橋等縣至海豐入海可以宣洩衛水異漲卽明永樂時宋尙書禮請開德州城西北河道泄水入舊黃河至海豐大沽河入海者也

國朝方直督觀承曾請修濬自前糧道葛正華廢歲修工程河道淤墊君請大府奏濬以洩衛河夏秋之漲臨清旣免閘口之虞直省一帶隄岸不致決溢淹及民田大府不以爲然及連歲閘口撫部長齡公始據君言奏請挑濬撫部吉綸公又請籌款歲修支河以是舉行不廢凡東省水利皆君發端也二月督運北上謁朱文正珪於都門留午餐文正面贈五古詩至四月歸五月弟星衢自直省奉委至江浙雇募津門

大差民船直省候補府李守符清同行過安德贈君七古詩弟星衢至吳門與江浙族人置田與僧鐵舟易一

樹園爲孫子祠肖孫子及齊將臚象

國初設立德州滿營駐防官兵五百口一口爲一戶迄今增至二千七百餘口而額餉無可加每年應需俸餉動支道倉米七千八百七十餘石內有折色米三千餘

石每一石支銀一兩近年糧價昂貴折色不敷半石之數官兵日增苦累君查道倉支贖餘米歷年運交通倉官丁運費共需米銀二千餘兩議以存給官兵本色不獨體恤滿兵又省運費乃移會邱方伯庭濬詳請長撫部齡入

告旋奉部駁以留存此項解通餘米京倉短額又稱遇災年分以何項支給滿兵等語君手自具稿覆議餘米解通原何定額如遇災緩無餘之年則不起運是本與正供有閒至兵糈支撥不敷東省有各年積存薊糧可以動撥等因始奉

俞旨施行計官兵一戶多得米數石滿兵歡忭為君送額曰體國恤軍懸之二堂十月至東昌濟甯催漕是月返德初君權臬時以先儒伏生承秦蔑學之後壁藏尚書唐虞三代載道之文得以不絕鄭司農康成箋注易

詩書禮論語孝經可比七十子身通六藝兩賢傳經之功迥在唐宋諸儒之上明人無識不為漢儒置立五經博士急宜興廢繼絕以嘉慶二年咨呈曹學使城請會同撫部奏請立鄭伏博士並檄鄒平令李瓊林訪求伏氏嫡裔六十五世孫敬祖年甫八齡家貧失學遂屬縣令為之延師教讀俾通文義以膺承襲嘉慶七年吳方伯俊始以君原議申上和撫部會同劉學使鳳誥入奏

敕下部議奉有

俞旨其後劉學使又以邱氏為左邱明後並請與鄭康成一體增置博士致奉部駁君復具稿移會邱方伯庭濬張觀察彤頂覆部議仍請為鄭氏設立博士且以鄭氏嫡裔既可準為奉祀生即可立為博士擬專摺具奏云十一月同俞君正燮撰古天文說成刊元本唐律及

宋本小字說文撰平津館文稿君以現任糧道督運全完加三級以資晉從二品銜

贈大父通奉大夫大母夫人

封父通奉大夫

贈母夫人本身

授通奉大夫妻

贈夫人

嘉慶十二年丁卯君五十五歲官山東督糧道二月督運北上舟中著尚書古今文義疏成臯陶謨及同洪君頤煊撰今文泰誓兩篇仲弟星衡旋里省墓四月君自邗州回署與洪君頤煊校刊唐王無功集琴操輯漢官舊儀漢官儀屬王君保訓集京房易傳六月長撫部檄調君之濟甯鞫事是月長撫部升任陝甘制府署藩石臬司韞玉被議降級君權藩至省居北察院行臺值部

使廣少寇興等在省按章供張煩擾君慎守帑項不肯通融支發廣興事竣北上獨無饋贈廣亦知君廉名僅索書扇而去其後以賄敗豫東兩省牽連獲咎者眾君不與焉衍聖公府有前明敕賜祀田俱係獨山等湖地日久爲民占種缺額至數千頃地方官聽任書役從中漁利不肯秉公審斷君在兗州道任曾委員查勘去任後十餘年懸案不結至是君據民人有自行呈首占地願歸還公府者因爲斷歸若干頃其後戶部奏請以湖地撥還公府缺額田有旨催辦當道卒爲弊吏阻抑事竟不行七月遣使迎父至濟南重游龍洞佛峪九月吉撫部綸至省君交藩篆回糧道任十月至東昌濟甯催漕十一月回德校選史傳別集未載之文爲續古文苑將以付刊仲弟星衡至自金陵十二月納金氏爲側室

嘉慶十三年戊辰君五十六歲官山東督糧道君父四歲而孤大母許太夫人茹苦守節撫孤成立及君父舉於鄉在都未歸君年幼乾隆二十四年請旌合例族子申請有司上聞至是君馳書當道檢舊案不得或已遺失或未施行君父仍為許太夫人請旌四月得旨賜建坊銀入節孝祠是年五月二十二日為君父八十壽辰君父欲南歸省視祠墓乃以二月中旬稱慶吳學士鼐彙都門相國卿貳之與君素好及有年世誼者製屏以祝父即於是月歸常州奉贈通奉公神主入大宗祠又奉許太夫人主入郡城節孝祠始至金陵祠屋三月君督運北上以前後任秩滿及五運全完例隨漕入覲五月十五日引

見越二日請

訓

上知君甲第及詢在部在東年分畢面奏以老父在籍乞假三月省親迎養即邀

俞允出京至固安工次視弟星衢因晤永定陳觀察鳳翔至張家灣登舟閏五月回署六月赴省與署任汪守為霖交替七月至金陵省父納潘氏為側室八月至常州謁祠展墓時靖江宋方伯勳居常州及劉學使種之趙司馬懷玉洪太史亮吉與君歡燕三日並至吳門修葺孫子祠又擇祠西鐵佛庵廢屋故址為許太夫人建旌節專祠肖像以祀焉訪友常熟仍回金陵立烈愍祠於王府巷烈愍公諱泰明建文朝為北平都指揮使禦燕師死事贈廣威侯明季諡勇愍贈象山伯乾隆四十年

贈通諡烈愍

敕修表忠祠立石主君奉父命與族人等仍建專祠請
官爲致祭九月登程再至常州視新建西行里大宗祠
又至吳門旋里展墓始就道時袁江挑濬直瀆由陸行
渡河自郟城取道費縣訪季想子墓得贖羊井銘於縣署
因屬郭令志青訪會點南城葬處並澹臺子羽墓立碣
季桓子井上十月到省接篆回任十一月至東昌催漕
是月返德父亦自南中抵署

嘉慶十四年己巳君五十七歲官山東督糧道二月督
運北上與弟星衢相見於河西務舟次四月君側室晁
氏以瘵疾暴亡晁氏金陵人從君十三年識字能書生
女前一年殤因哀感成疾君遣其柩南歸權殯於揚州
之秋雨菴是月君自通回署六月吳學士肅自晉東來
安德泛舟衛河始有談燕之樂越月南去先是與嚴孝

廉可均校集所藏周秦漢晉六朝唐宋碑文爲金石萃
編又采鍾鼎文字爲說文翼至是手爲校定又据嚴孝
廉說文校議條錄書傳所引說文異同以附刊宋木小
字說文之後撰孫氏譜記輯澄清堂文稿君官充沂道
暨權臬時嘗考太平寰宇記先賢閔子墓在范縣東知
今所傳在歷城者爲後世流傳之誤會檄縣令訪求遺
墓迨嘉慶癸亥冬再至東省以觀振按行范縣知墓所
在爲河溢不能詣謁及官糧道忽夢濬井出古丈夫布
衣泥塗狀自稱閔子覺而異之因出貲屬縣令譚文謨
訪視廢墓申禁采樵嗣以縣令屢更事未施行華亭唐
晟宰是縣始捐廉以修祠堂門垣栽種柏樹申報乞君
爲文紀事並訪義士左伯桃羊角哀墓於縣之義城寺
東乞君考其事以存志乘是年恭遇
萬壽覃恩君以少時受業同祖兄因請以應得四品封

孫年譜卷一
三
馳封兄耕並嫂薛氏是冬無雪十一月君催兌至東昌
自省城至濟甯而返初五日過長清嶺山驛約縣令王
華封詣五峯山祈雪後二日過泰安復至岱廟祈求越
三日自任城至安德俱得雪二三寸刻石記其事於岱
廟碑側

嘉慶十五年庚午君五十八歲官山東督糧道四月督
運北上總漕玉侍郎甯戴侍郎均元招同洪殿撰瑩燕
集尚書館成七律二首殿撰向學於君翼日來謁招同
陶戶部渙悅陸孝廉堯春飲舟中旋聞兩侍郎以東省
米色純潔入奏有潞河舟次即事七絕十首君弟星衢
於是年正月擢任永定河三角淀通判舟還留通判署
五日為弟納妾李氏五月望前回署適同里臧文學庸
應順天試過安德謁君下榻踰月與君及洪君同校管
子此書多古文古義世鮮通者將刊以傳之君以向所

撰皋陶謨義疏授臧君跋其後云此篇以史記參定古
今文詮夔曰為夔於是及引說文刑卽頡頏之類說極
精宜早成全書以惠來學又屬臧君覆勘天官考證此
書本君手自撰輯前歲臧君續成之君又偕管君同采
輯周秦兩漢舊義為尚書義疏稿畢君以田適自東昌
來祝君父壽見臧君管君極相契為平津館一時佳話
嘉慶十六年辛未君五十九歲正月弟星衢調任北運
河楊村通判三月督運北行奉父至弟署時君病氣痛
時發時止交糧既畢即從陸路歸楊村四月上旬與
弟泛舟侍父並親串眷屬等由白河至禹壩風日晴好
嚴尉鈺為作白河聯舫圖五月回德至州七月引病十
三日酉時生一男十八日交卸廿六日登舟南歸重九
前一日先抵金陵眷屬等十一日亦至寓五松園十月
移居冶城東麓烈愍祠十一月偕弟星衡歸里祭埽直

孫名詩卷一
至吳門回自丹徒登焦山遇雪信宿過臘八日始歸邀
顧君廣圻至寓校訂古籍江甯王德福撰已下
嘉慶十七年壬申君六十歲在金陵值方督部維甸家
居姚比部鼐石殿撰韞玉皆主講省城書院多文苑之
事四月侍父旋里直至吳門歸刊成績古文苑平津館
書二集十一月復至吳門遂往揚州至臘月歸
嘉慶十八年癸酉君六十一歲四月自金陵至吳門遂
往雲間修松江府志同朱太守淶泛舟三泖湖五月在
吳門六月歸金陵十月旋里至吳門因病即返是年與
方督部維甸繼觀察昌校刊抱朴子內篇
嘉慶十九年甲戌君六十二歲三月旋里至吳門四月
歸金陵七月至揚州鹽政阿公聘校刊全唐文十月旋
里至吳門十一月歸金陵先是君為尙書古今文義疏
牒稿屢年至是成書君先又與從子壻龔慶族弟星海

輯錄孔子集語至是屬嚴孝廉可均重加蒐補編次成
書嚴孝廉為之序君自擬進
呈表草

嘉慶二十年乙亥君六十三歲三月旋里至吳門遂至
揚州五月歸金陵九月至揚州十一月旋里至吳門尋
歸金陵十二月十九日集金陵詩人於五松園為東坡
生日懸畫像致祭君為詩以紀其事即用東坡登蔣山
韻與會者二十一人皆有詩是年孔子集語尙書古今
文義疏刊成

嘉慶二十一年丙子君六十四歲主講鍾山書院二月
與嚴孝廉及弟星衡撰輯全上古三代秦漢三國六朝
文父再逢鄉舉

盛典經前安徽胡撫部克家奏奉

恩旨重赴鹿鳴宴吳學士鼐自揚州來君與陪侍賓筵

從子壻龔慶中式順天榜第二十八名舉人集同譜百人各賦詩以紀其事十月旋里至吳門十一月歸金陵嘉慶二十二年丁丑君六十五歲主講鍾山書院命題課士兼策問詩賦以敦勸古學諸生執經問字者日盈於庭與在浙時同繼方伯昌重來金陵同年方觀察體適調鹽巡道相聚甚歡余太守需元博雅好古摹刻吳天發神識碑囑君爲記同里瞿觀察曾輯自蜀解組亦僑寓白門時相過從多文讌之樂五月爲父預祝九十壽吳學士鼎來金陵撰文作屏幃舉觴稱慶七月編輯近作古今體詩刊成九月與弟星衡子篋廡等侍父旋里至吳門十月歸金陵又至揚州十一月復與弟星衡旋里埽墓至吳門歸途大寒行風雪中兩足腫先是辛未歲君病肝氣痛作止不常積七年每發輒數日不飲食至是乃尤劇自知不起

嘉慶二十三年戊寅君六十六歲病亟遺令薄殮言不及私惟以父老九十未能終盡孝養悲不自勝正月十二日卯時卒二月嚴孝廉輯君雜文之未刊者爲冶城山館遺稿

孫淵如先生年譜卷下

一萬四千九百七十五

Blank lined area for text on the right page.

